

復齋先生龍圖陳公文集

復齋先生龍圖陳公文集卷第六

奏劉

嘉定乙亥應 詔封事

臣聞天人之道本無二致人事乖刺則天變頻仍去
秋日食晝晦太白經天考之載籍咎必有在 陛下
憂形玉色慮軫淵衷而羣臣不能將順至意顧委之
天數歸之分野使求言弭災之典因循不舉乃入春
以來時雨不降孟夏過半種未入土遑方遠徼或以
潦告而京畿輔郡乃獨亢旱天意震怒蓋亦可見
陛下日夕焦勞疏食拜跪並走羣祀精誠懇切蠲租

已責款過宥罪凡可以感人心回天意者畢舉無遺
而旬日以來驕陽彌甚求言之詔於是始下 聖訓
諄惻凡在臣子孰不隕越況世臣受國恩忝綴班末
其敢以卑賤為解而默默無言乎臣聞應天以實
不以文 而天意未回人心莫喻臣常出位而思
意者內而宮闈儀形從未有未至乎外而朝廷權柄
抑有所分乎大而政令刑賞尚有舛逆乎疎賤之臣得之
傳聞宮中宴飲或至無節非時賜予為數浩穰一人疏
食而嬪御不廢於擊鮮邊事方殷而椿積反資於妄用
倖門寢啟請謁盛行 祖宗在天之靈豈能無怒閤

閭下俚之賤亦至有言夫天之於人主侯父之於子也子方見怒於父母而為其妻孥者亦宜憂懼惕息若曰一人當憂勞而後宮無與焉臣恐上天之怒未易遽已而災異有不可回矣昔成湯六事之禱拳拳於女謁之盛所繫非輕臣所謂宮闈儀刑有所未至者此也 陛下即位以來二十餘年政事一付之中書然而天下之大事機之繁有非宰相獨立之所能辦必求寮掾以分其勞而委任之間易流偏黨何者大權所在孰不奔趨自非至公寧能無蔽臣聞之衆庶咸謂比年以來所用之人非親則故姻婭之外必

貽譏三同大而執政必擇易制之人要而臺諫必用
謹默之士都司樞屬機政所繫無非親暱之私逢迎
之黨交相納結根據要途爵賞視其苞苴陞黜由其
毀譽姦貪之吏苟能媚憲則無不得志廉正之士不能
由徑則動輒招由大臣惟其言是從而不知為其所
誤人心胥恐同然一辭昔卜式謂天旱乃弘羊所致
殆幾類此臣所謂朝廷權柄有所分者此也政令之
行凡上之所喜皆下之所惡如鹽鈔之變易楮弊之
稱提安邊所之創立固執已見動失人心敗軍之將
躡寘殿巖庸鄙之夫久尹京兆監司郡守爭事苛刻

內外揔戎公肆摅歛倖貳有何勞績輕施爵賞縣令
不俟滿秩遽獲陞遷宿將有勞守之功乃以小過而
貶逐三衛無汗馬之勞或托公勤而超擢游士謗議
罪狀未白遽寘重刑儒官調選既遭吏辱復加錮斥
賞罰失平若此豈不有以傷和氣乎昔 淳化中旱
蝗寇準以為祖吉王淮同罪異罰刑政偏頗之所致
信不可誣臣所謂政令刑賞或有舛逆者此也臣前
所陳皆當今時政闕遺之大者欲望 陛下交敕內
外一正紀綱亟反其失以為後圖如此而後不雨臣
請伏而謾之罪干犯天威罪當萬死

輪對第一劄

臣猥以庸賤誤蒙 聖恩擢寘班列賜之轉對俾望
清光蓋將采其一得之愚非真使之應故事而已況臣
父先臣俊卿事高宗為侍從事孝宗為輔相臣又紹
興受恩常恐無路報塞頃因 明詔妄進瞽言席藁
私室以俟大戮 陛下不惟不加之罪又陞擢之是
陛下許臣以言矣許而不言臣則負恩臣聞人主
制天下之權則德貴乎明大臣任天下之責則心貴
乎公臺諫主天下之論則言貴乎直理亂安危實在
於此仰惟 陛下即位以來宵衣旰食聽覽忘勞有

周文之勤清心寡慾服御無華有夏禹之儉遇災睹
異恐懼脩省有殷湯之敬已責罰祖誠意惻但有漢
文之仁自昔人君有一於此皆足致治今陛下兼
有衆美而治效若不及數君意者陛下之明無乃後
有所未用歟夫惟明之有所未用是以權綱不攬而
委任之太過規摹不立而簡陋之是安此陛下臨
政雖勤而治功未舉也內帑漏於姻戚宦寺外藏靡於
營繕賜予軍實不加覈而虛籍尚存貪吏無所畏而
賄道俟存此陛下奉身雖儉而財用未豐也謹告
之證屢形銷弭之術未至言議徒多施行者幾此

陛下事天雖敬而誠意未孚也寬恤屢詔而奉行之
吏不虔振貸多方而常平之實無幾此陛下愛民
雖仁而實惠未徧也良由陛下一切聽從不加省
察於是上下相蒙務為欺蔽既往之咎臣不敢贅言
姑以近失之最著者言之陛下克謹天戒博采人
言既奏囊封有懷畢吐或及用人之誤或指行事之
非豈無忠加可裨理化陛下付之近臣俾加差擇是
有意於行其言也有司惟取其專政上身與夫移咎
牧字之章騰播中外以答觀聽且自昔災異之來或
乾文示誚或坤載失寧厥咎未形容有可諉未有赤

地千里飛蝗蔽天如此其可畏也侯或諱晦隱避文
致其辭曰旱不為災蝗不傷稼其他誣罔抑又可知
使陛下加察而懲儆之則人將何所肆其欺哉
陛下果能每事而致其察則情偽立分是非立辨人
心奮而治具張以四德之美而收數者之效矣臣
故曰人主之德貴乎明者此也大臣者秉國之鈞持
天下之衡者也而其心則貴乎公夫人言者天下之
公議也爵祿者天下之公器也賞罰者天下之公法
也雖以天子之尊萬鈞之勢侯不敢肆其胸臆況臣下
乎故必行之以公而後可以服天下之心開禧間特

權之臣私欲流行公道隔絕訖至生民靡爛自速顛
擠更化以來力反前弊然旋觀施設浸異厥初竊聽
輿言旁叅近事謂建議求言之人則以他事逐之諫
官言事稍直則以他職徙之忠憤者指為不靖切直
者目曰沽名惟一二私暱之言字不可破其於公議
何如也衆怨所萃則相繼超陞陞物論所歸則以次
踈外某人之遷衆皆曰是嘗重某人罪以快同列之
私忿者某人之擢衆皆曰是嘗援古事以文迹日之
天變者輔藩要郡半處膏梁清職美官驟加闡葺所
愛非可教之人所敬無推誠之實徒欲苛晉老病用

示殷勤其於公器何如也直節重望以私嫌而久棄
老姦宿賊以巧請而牽復監司郡守雖無殊績已所
欲與則託職事修舉而加之賞縱有願罪已所欲庇
俾則理作自陳而佚其罰其於公法何如也使二三
大臣果能塞僥倖之門杜邪枉之路陛下采天下
之公議守天下之公器行天下之公法則好惡不至
於徇其私親故不至於怙其寵舉錯當而人心服矣
臣故曰大臣之心貴乎公者此也臺諫者國家之命
脉而天子之耳目也故我祖宗擢之必親有非宰
相所得而與蓋欲使之直言而無所顧忌也其

所議論必關於國家之大計其所彈劾必及於當道之巨奸開禧間臺諫之進悉出權門曲意順從養成太饕更化以來事與曩異正人迭用公道漸開然議者佚謂平居未嘗立異遇事不敢盡言有如殘虐再通尤開國體近而侍從下至生徒莫不力爭翼禪廟算獨於言責不出一辭或是或非詎容無說國有大疑佚且默默其所議論可知矣至於彈劾當罪固多然議者佚謂輦轂之下乾沒鉅萬則莫敢誰何州縣之間罪謹毫髮則撫以塞責梟狼不問蟲鼠是求其所彈劾可知矣大臣所為之事則遂之所不右之人

人則排之 仁宗朝有宰相奉行臺諫風旨之譏今
乃有臺諫不敢少違中書之誚是豈 祖宗設官之
本意耶使臺諫之臣果能直道而行盡言無隱凡所
議論必關於天下之大計凡所彈劾必及於天下之大
奸則政治豈有不善邪佞豈有不戢哉臣故曰臺
諫之言貴乎直者此也臣之所獻三言皆治道之要
而機括所係則在 陛下夫天生人君未嘗不賦之
以明哲之資顧其用與否耳書述堯舜一則曰聰明
二則曰聰明美其有是資也必繼之曰克明俊德曰
明目達聰又美其能用是資也夫以陛下天賦之明

苟知所用則向之所謂數者之過曾何傷於日月乎
況聖人不貴於無過而貴於改過故成湯改過不吝
孔子有過人必知之是雖聖人不能無過而以改過
為美也下逮秦穆悔過之辭最為深切書錄之漢武
末年輪臺一詔史書之秦穆漢武本無他美而書傳
所以稱之者特以其能悔過也今 陛下一旦幡然
悔悟昭其明以照臨百官日與大臣臺諫論治道而
更張之則大臣臺諫亦必能痛自懲艾公心直節以
副陛下望治之意矧今災異未已事變方殷豈君臣
上下諱過自文苟安避事之時乎惟 陛下亟圖

之天下幸甚

第二劄

臣聞易著除器之戒詩述備械之美况邊事方殷武備尤當加意竊謂東南長技惟在於弩昔吳人以強弩萬張破曹操於濡須宋武帝軍中多萬鈞神弩所至莫不摧陷此往事之明驗也 國朝景德中澶淵之役契丹偽順國王撻攬為李繼隆等勁弩所斃治平中夏國主諒祚寇慶州大順城守陴者以弩中之諒祚歸國而死此近事之明驗也然則弩之為用大矣臣備數戎監主簿常暫攝丞職每旬至御前軍器

所點閱所製軍器乃知淳熙九年本所準五月七月
指揮造神勁角弩五千張方造及八百四十張當年
九月內指揮諸州泛拋物料權行放免自此因循弩
遂不造竊見軍器所日役工匠一千四百餘人而羽
毛齒革之人斷續稀少辰入午退凡所造軍器歲計
無幾而不造弩者三十餘年豈但虛糜廩食緩急必
至誤事至於弩之制度務在彊勁唐絞車弩中七百
步本朝連弩亦射三百步外不知今諸軍之弩力果
及之乎蓋弩之勝弓者以其射疏及遠苟不及遠與
弱弓何異臣愚欲望聖慈詔三省密院多給錢物

置場收買材料令本所日下製造神勁角弩務在精
勁給降三衙及江上諸軍仍降弩樣令逐軍依樣製
造若諸軍所造溢數即乞分撥荆襄沿淮州縣給付
民兵農隙教閱其於壯國威而銷外侮蓋一助云取
進止

安溪代人擬上殿劄

臣聞繫民之休戚莫如縣令事繁而力不給又縣令
之通患也夫方伯連帥監司郡守其繫於民者非不
大也然事無大小多始於縣至於刑獄尤民命之所
繫今大辟重囚往往成於縣令之手縣上之州則州

不能以異於縣州上之監司則監司亦不能以異於
州等而至於省部大率視其已成其間能摘奸糾繆
以直其枉者有幾縣令之繫於民豈不甚重已乎夫
州有曹掾各司其職太守挈綱而振領焉令以身任
一縣之責賦不登則有罪訟不決則有罪刑不當則
有罪所謂丞簿尉號有分職乃若越人視秦人之肥
瘠故令雖有閎辯通敏兼人之才亦未久而不因
者是豈可不思其故乎臣嘗觀淳熙令未嘗不仰嘆
孝宗皇帝所以致一時至隆之治有由也準令諸
縣丞簿尉兼日赴長官廳議事仍於長官廳或都廳

籌書當日文書注謂應行出者蓋欲一縣之官共治一縣之事此國家設官分職之本意也令令之才者則恃其聰明恐同寮之撓己貪者則肆其私欲恐同寮之窺己其無能者寧受成於胥吏之口是以催科獄訟舉不得平追逮捕繫濫及無罪欲田里之安而愁歎之息豈不難哉臣愚欲望聖慈申嚴濬熙令俾丞簿尉日議事於長官廳凡行移文書並同簽押其或一事乖戾坐罪惟均庶幾同心叶力期底於治如此則賢而才者不至獨勞貪而謬者害不及下此雖已行之令申而明之則於政治之本誠非小補如臣

言可采乞付外詳議施行

申請延平書院敕額劄

竊謂事有關於斯文之統紀風化之本原者守臣之所當上聞也惟道統之傳遠自羲黃迄於孔孟秦漢以來不絕如綫至皇朝之盛治有濂溪周享頤明道程顥伊川程頤相繼挺出而孔孟之統以續二程傳之楊時楊時傳之羅從彥羅從彥傳之李侗李侗傳之朱文公熹而其學益盛楊時自崇觀以來歷事三朝居法從入諫省侍經筵嘉言善行學者師之朱熹榮蒙孝宗簡知光宗屢加擢用遭遇聖明

初政嘗以大學入侍親蒙顧問俞音琅然至於發明
正學辨析羣議著為成書其有功於斯文也尤備曰
從彥曰侗則固窮守道肥遯山林雖顯晦殊迹而道
統賴以有傳其揆一也爰諏譜牒楊時羅從彥實本
郡將樂人李侗劔浦人朱熹雖居鄰郡亦生於本郡
尤溪之寓舍伏自漢唐以來幾二千年而未有與道
統之傳者今以斗大之州不數十年之內出而宗主
斯文者有四豈惟一邦之創見實皇朝之盛美也至
今文獻典刑猶有存者士大夫過其境慨歎興慕而
侗像弗立誠為闕典况其山川秀傑人物英毅自陳

忠肅公瑾而下名人輩出使有以風厲而作新之必
有相繼而興起者矣某忝竊郡符職在宣化惟是到
任以來窘於荒政今稍寧息始得地於州城之南創
延平書院一所授白鹿洞比建立禮殿旁祀楊時師
生遺像以慰往來士君子之恩分立四齋以聚生員
薄儲廩給以待讀書脩身不屑課試之士某先以俸
錢兩月為之經始繼節浮費以落成之少見尊崇道
統之意於聖朝風化或有小補載惟白鹿嵩陽雖
陽嶽麓所謂四書院者皆蒙祖宗崇尚褒表分之官
書賜之扁榜矧此師儒之鄉道統所繫又非四書院

之比而隱默不聞某則有罪謹昧死條陳除已具錄
奏聞外欲望朝廷特賜敷奏乞敕賜延平書院四字
為額如或可行乞下禮部諫議施行

嘉定甲申辭危漳州乞休致劄

某一介庸陋初無寸長誤蒙國恩以先臣某嘗相
孝廟補官入仕叨竊過分三綰郡符無功而祿鬼神
所誅自季秋以來風疾大作右手偏廢不能執筆委
是不堪仕宦若不早謝事陰譴必深上有老親年垂
七袞若蒙清朝俯徇螻蟻之欲俾守本官致仕庶延
殘喘少奉慈顏實受天地父母再造之恩除已自本

月待闕請給不敢於本軍請領外乞備申尚書省

第二劄

某熾烈小臣竇緣命薄得疾瀕殆輒從本軍陳乞致仕冀緣納祿少殘延喘幸而未死竇朝廷寬假優容之恩茲者恭蒙 溫旨不俞辭命震恐罔知所措惟是自今飲食不進疴羸日增闕期在近決難赴上若不預申祈懇後時瀆犯為罪益深

第三劄

某於十月三日祇領省劄當於次日再請申繳回黑匣去訖今年又準九月二十九日省劄指揮謹具申

尚書省伏乞朝廷矜憐病困俯從前項所乞特賜敷
奏改差下政施行

第四劄

某頃因危病屢乞退閑庶幾消弭疾殃保全性命不
揆螻蟻累犯雷霆久俟誅夷尚蒙寬宥聖恩深厚
九隕莫酬既非病風喪心何敢抵突稽慢竇緣病久
食少疰羸日甚委難勉強就道加以近得瞶疾不辨
語音委難參聽詞訟惟有控告君父剖露惻忱萬
一朝廷以某年事未至不許休退即乞改差某替方
校書宗成資闕使某二年之間一意醫療倘獲痊愈

走惟命

第五劄

某至愚極陋叨玷門底入仕三紀三忝郡符初乏寸
長徒靡廩粟乃於前歲之秋驟得危疾是時心口相
語惟有辭榮可免天譴是以不避誅夷叩闕有請前
後凡四次申述委屬煩黷今來又準 聖旨指揮一
介小臣腰領豈足以仰薦斧鉞唯是自知甚明別無
規避兼清漳便郡去家咫尺奉親就養在人子豈非
至願竇緣疾病之餘進感戶門先生長兄實年七十
卒入仕五十年未嘗歷郡次兄守僅試而郡旋亦凋

謝今某僥倖比之兩兄已為過分使無疾病後當止
足況目今手顫心忡日食不能數合投之閑散尚恐
顛儕況千里重寄若為勝任真情迫切所以屢犯雷
霆隕首臨朐不敢異詞者也欲望朝廷興憐因忤特
賜敷奏俾遂所祈則是朝廷續之以已絕之年在某
宜如何報

第六劄

某自前年得危疾荏苒日深羸瘦骨立自度必填溝
壑凡身役之事無不預為之備衆所共知所以哀投
造命屢伸前請兼考本朝典故凡小臣年雖未至

以病乞休致者無一不請而得今某蟻蝨微官前後凡五請聖恩寬大未賜俞允且拜趣行之命至蒙剖下諸監司及本軍催某前去之任此皆近例所無某身非土木寧不感奮所以不敢再控休致之請祇乞改替已差下知郡方滌闕庶幾兩年待次心志安閑加以治療冀獲更生今又準聖旨指揮不勝大懼苟可扶憊而前安敢屢致黷犯實緣病瘁益甚醫藥未效况郡久闕守養病廷延有曠千里之責為罪愈深如朝廷以某樸嫩小才未忍捐棄乞特與祠祿一次使某得以一意將理他時未死應有繁難差使誓

竭爲鈍不敢辭避

辭免廣東提刑乞休致劄

某於八月二十一日準省劄八月十一日三省同奉
聖旨陳某除廣東提刑填見闕令所在令州軍差撥
兵級三十人津發疾速之任候任滿前來奏事兵級
逐州吏替遇接人到日止具已起離及到任月日申
尚書省竊念某屢控危衷黷犯朝聽聖恩寬大不賜
誅夷顧蒙超擢畀以東廣祥刑之寄乃填見闕俾即
就塗感極涕零以榮為懼自惟愚陋遭值明時豈不
願勉 駕力上答恩遇實緣久病生意浸微飲食起

居全未復舊精神恍忽力乏走趨既不任於驅馳敢
冒叨於榮寵若不控避必速顛濟用是哀鳴願回渙
汗所有上件省劄不敢祇受已寄本軍軍資庫欲望
朝廷特賜敷奏收還成命改畀岳祠保全病軀實荷
更生之造

第二劄

某病根深固體力尪羸所以屢丐祠廩者度非三數
年間極力療治莫冀生全今來供拜嚴旨趣使就
道天高聽邇未亮微衷重念某螻蟻小臣世荷國恩
碎身粉骨不足論報使病軀稍有支吾應有任使豈

當辭避養疴方命其罪已不容誅設若無疾而稱病
辭小而受大則因上要君之罪覆載不容九殞奚贖
謹瀝血忱控告君父乞念某前後所陳並非矯偽特
賜追寢成命改畀祠祿俾得專心醫藥以盡餘年竇
荷生死肉骨之恩

第三劄

某自惟一介愚賤憑藉世祿初無寸長蒙公朝擢
用偏州畀之憲節職司重任祥刑重寄可謂寵榮過
分矣況當大明御極天下拭目以觀新政使某無
疾豈不願勉策駑駘以効奔走而頻犯天威自納不

測之誅聖恩寬大屢加赦宥有君如此寧忍自棄實
緣前後控辭始終一忱惟是貪榮冒進必至身殞道
途今來已是第三次控告小臣違禮犯分至此極矣
欲望朝廷俯鑒丹衷曲加矜憫特賜數綬改畀岳祠明
未死之前尚圖報塞

辭免直秘閣劄

某官雖卑賤義當控辭伏念某頃因危疾體力羸困
一意丐閑冀延餘息朝廷寬恩恕其黷犯不忍加誅
既從所欲在么麼小臣可謂萬幸惟是寓直道山朝
廷所以待清流自非儒學聞望見推士林麾節服勤

績効顯著不在茲選如某庸陋初乏寸勞考之資格
豈應冒受況比者辭榮本以弭疾今若冒寵必致挺
灾不惟有負初心蓋亦深慚公論欲望朝廷特賜敦
奏收回誤賞庶使某少安愚分以瑄顛濟所有除直
祕閣指揮省劄寄收本軍軍資庫不敢祇受

第二劄

右某於二月二十日具狀辭免直祕閣恩命三月廿
六日準尚書省劄子備奉 聖旨不允某聞命震驚
罔知所措愚衷未罄敢憚控陳伏念某賦分綿薄福過
災生頃因疾病力辭榮寵祠祿之請誠非素心仰荷

聖恩曲從所欲無功坐蠹已極叨踰強顏拜命不勝
隕越中祕清職實出異除若匪名流不容輕畀如某
何人豈應濫廁自惟官卑不當屢瀆兼比年辭遜頻
犯天威今來不敢苟具辭免欲乞朝廷特賜敷奏容
某它時疾勢痊安擇日祇受庶幾緩死實荷更生

復齋先生龍圖陳公文集卷第六終

復齋先生龍圖陳公文集卷第七

雜說策問

南劍道南堂仁說

某竊謂學者朝夕所當講論致知力行者曰仁而已
文公朱先生謂仁者心之德愛之理所以發仁道之
蘊以示人也又曰惟全體不息者可以盡之所以極
為仁之功以勉人也蓋天地之大德曰生而人之一
心因其此生理以為德焉以天而言元利貞莫非
天德而元為之統以人而言仁義禮智莫非人心之
善而仁為之長如元者所以生物也而亨即元之通

利即元之宜貞即元之復也仁者所以及物也禮者所以行此義者所以制此智者所以知此而已非元之外又有所謂亨利貞仁之外又有所謂義禮智四者相與角立而並列也故孟子曰仁者人也程伯子曰識得仁體則義禮智皆在其中程叔子曰仁偏言之則一事專言之則包四者是以論語一書言仁多矣而各不同如夫子答樊遲之間仁以愛人有子以仁道之本在於孝弟之類乃程子所謂一事之仁文公所謂愛之理是也如曰巧言令色之鮮仁剛毅木訥之近仁顏子之克己復禮謂之禮可也比干之忠

諫殺身謂之義可也此何關於仁而皆得為仁若此之類即程子所謂專言之則包四者文公所謂心之德是也夫論語之所以言人者雖若多端而其要不出乎文公之六字可謂至矣盡矣而又有所謂全體不息者何也蓋仁之為道至大而難窮非一事之所能盡非一息之所能達惟其非一事之所能盡所以張子曰禮儀三百威儀三千無一事而非仁也學者存心措慮周旋動作有一事不順乎理則不得為全體矣惟其非一息之所能達所以曾子曰死而後已不亦遠乎是以學者自朝至暮自少至老苟一息之

頃或有懈怠則非所以為不息矣蓋人固有一事之
合理而未能事事之無愧一時之無私而未能攸久
之不渝有如齊楚二子之忠清洙泗三子之果毅此
特得仁之一體而不可謂之全體也顏子之三月不
違庶幾於不息之功矣揆諸聖人猶不免一間之未
達況餘人乎仁道之所以難成而舉者豈可不加弘
毅之功哉大抵不言心之德則無以知仁之為體所
該者廣不言愛之理則無以知仁之所以得名之實
舉其偏而不能極其全則無以見仁之用無時而不
行學者誠能反諸吾心以驗其德之存亡因其愛之

所發以察其情之公私則所謂心之德愛之理瞭然於吾心目中矣動靜語嘿無非此理之流行小大衆寡無非此心之貫注無須臾之或離無造次之或違則全體不息之功渾然於常行日用間矣文公一生用功之深晚年所造之約所以開悟後學者不過此十字學者其可不盡心乎

後原道說

道出於天人稟二氣五行之理以為性稟二五之氣以為體故人為萬物之靈人得其全物得其偏浮屠者亦西域胡人之最靈者也然亦不免偏而不全空

而不實何以言之吾之道無一理之不具無一事而非實曰仁曰義曰禮曰智曰信處人倫之際恭敬誠慈至於手足容色各有其則而不可亂浮屠氏則一於慈曰萬法皆空而已今不必廣引經傳姑以釋氏之事明之彼網維相攝師弟相傳朝暮之拱揖飲食之節適一事空則不能一時安且事之最空者其若人之拱戟其手非如飢寒之必不能廢衣食也今使釋氏主首座於堂上而羣下戟手以進為主首者能不怒而責之乎況沙不可為糜鹹不可為醢斷然不移而謂吾君臣父子夫婦朋友兄弟而可以絕

滅不為乎彼之說所以沉酣於人之骨髓者不過曰恐之以禍耳謂人之生不能無罪飲食男女貪嗔喜怒皆罪也不知天理人欲和同行異情得其正則為天理失其正則為人欲今充浮屠之說必閉口枵腹人欲絕滅獸蹄鳥跡交於中國然後謂之人彼守道之人終日戒謹恐懼如在上帝之旁一念之非不旋踵而悟雖不能無過尚何罪過之有今日刑罰人皆罪也牲殺皆罪也甚至婦人產乳則又曰其罪益大焉昔歐陽子言庖犧氏首教人為犧牲則昔為人間之聖人地下之罪人也今謂地下之獄慘酷尤甚凡世間盜

賊所不為之暴皆於地下見之則世所謂閻羅者乃
地下之聖人也人間之桀紂也其可哉世或有不畏
禍之人則又以福利誘之曰信向者死而生極樂之國
其次不失復生而為富貴之人不信者反是使有是
理聖人不以告人是不智也今直以萬物觀之物之
生死可見者莫如草木春生秋死氣與化俱未聞今
秋之木葉復反來春之故枝使釋氏果能福人是能
使已死之鳥獸復生已墜之木葉復反豈不神哉今
猥曰來生受報舍目前之近効驗異日之虛應又可
乎孔聖教人以大學為首曰致知在格物物各有理

格而致之然後無疑故從善也實去惡也果今不格
物之理而信異教詭譎之論未必能爾翼而相之
者力有焉不能無望於當世君子以吾道解其惑也
吁孔子之道明則邪說熄聖賢豈欺我哉

恢復論

帝王之道備而無虧斯謂之天下君矣少虧則為霸
咸無焉則為夷狄而地之小大偏正不繫焉故古之
人君務廣德而不務廣地殺一無罪雖得天下而不
為故民愛之如父母驅之使去而不從況有背畔之
患乎後世以勢力翹持天下欲民皆已從利皆已歸

予奪生殺皆由己出不必道之合也曰不如是則權柄下移而國非君之國也苟利於我雖盡殺天下之民而亦為之雖勦殺同氣篡弑君父無難也曰不如是則吾將受其害嗚呼天下之禍莫大於畏其害之及己也苟畏其害己不至於夷狄不已也如是則雖朝秦楚蒞中國謂之曰君可乎聖人作春秋曰中國而用夷狄則夷狄之夷狄而用中國則中國之以此見中國夷狄以德不以地明矣然則帝王者有其道之位非有其位與地之位也舜由匹夫為天子湯文皆以小國有天下後世仰而畏之非畏其地大兵強又

明矣我 宋南渡百餘年四聖相授地雖僅復四分
之一而道德無異於三五之盛文武之士兵財之數
皆不及於承平之半而夷狄咸曰正統所在不敢睥
睨者以帝王之道在此而不在彼也今主上專以規
恢帝王之道為務而不以勢力操切天下搢紳之
士專懷仁義以事其君而不以功利自營其私則無
怠無荒四夷來王厚德允元蠻夷率服此必致之効也

論車制

成周兵農兼事夷狄不敢侮中國又以車制騎故詩
曰嘽嘽煒煒如霆如雷言車之震聲蕩胡騎望之而

辟易也今東南一隅之地民百而兵一又不選練車制盡廢舍中國之長技而欲以短兵孤矢御天驕之氣是猶驅羣羊以抗豺狼也今車制不講德不修備不素而曰胡虜不我侵豈為夷虜反間者耶不然何其愚也

論射

子曰射不主皮為力不同科古之道也通釋曰若主於貫革則無力者不得與不主於貫革則人人皆可射愚謂古人凡稱男子皆以射觀德又所以侮禦今一邑之中以射稱者曾無一二此後世所以多夷狄

之禍歟

葬議

韓信葬毋擇高躁地旁可致萬家者此不過志大耳
非利其吉也郭璞始以吉凶論自葬其母未幾被王
敦之禍至今反遵其說貽惑萬世夫人之窮通天壽
命懸於天而地理家以為地之善者所致也然則孔
聖曰富貴在天者非邪今人習於見聞不安義命親
死過時不葬曰吾不怠輕葬也若是則衰經不除非
葬事不問必遂寃宥然後反吉服可也今也錦衣玉
食不愧不恥又有知地理無益而遷延歲月畏憚費

役而凡所以營妻子之溫飽者則若沃焦掾頭然之不暇是坐視其親之不得歸土如旅人之栖栖厚愛薄孝此其人比於禽獸何異焉書曰乃祖乃父乃斷弃汝不掾汝死是祖父可以降罰于子孫也求善地以徼不可必之福於子孫而不孝違禮以招不掾死之禍於祖父可不謂大惑耶

南康築子城說

國必有城古之制也春秋時國邑如鎰銖未嘗無城無城非國也古者建國之初君民一力為之故民不以為病又非一時所能成故民不告勞今本軍不能

為城不得已節浮費而為子城設有寇則二千石之
老幼皆可保千人之軍足以守也不為於閑暇時猝
有寇來則曰無城也誰之罪歟或曰擾民也曰一毫
一縷不歛於民皆如富人之為墻壁民恐不為耳作
子城說

續愛蓮說

周子為愛蓮說盡矣某又推廣之開以子闔以午喜
陽而惡陰一也暑不能濁雨不能濡寄迹泥途之
中超然造化之表二也一年種之百年不絕豈出天工
不假人力三也華實既稱根葉能香四也材為時用

無一可弃五也一花一葉對待不孤六也備此六美
百卉豈可同時語哉意者化工三春之餘收拾餘巧
一施之大夏不然何其奇也詠歎不足作續愛蓮說
嘉定己卯五月十日也

衛君子傳

衛君子者淇水人也為人峭真特操屹然自立無所
附麗詭隨也性喜僻居不入城市每暑風塵至輒
擁扇自蔽惟恐其汙己也羣朋離立終日杜門蕭然
有物外趣人不敢干以私望而敬愛之俗士不屑納
交惟晉王子猷好之而阮嗣宗之流彊與之附亦未

嘗輕合焉子孫號為繁盛每出森然成列盈於階除
性又嗜古書圖畫無所不通身兼數器上而朝廷官
寺下至閭巷卑隸莫不資其用焉其祖夷齊避干乘
之國以成仁子孫則而象之至今不變所謂歲寒不
改節者也其族散處江浙最盛於筠詩人之比德武
公云太史公曰昔伶倫作律取則於君以效鸞鳳
之鳴漢高帝得天下過沛嘗與君擊筑大風之歌其
聲震雲漢嗚呼斯人也其有虞氏伯夷之徒歟不然
直清之德何以並列於三后哉

安溪縣試諸生策問五道

策問一

古者家有塾黨有庠遂有序以至於國有學則天下無不建之學自幼子常視無誑八歲入小學十五入大學則天下無不教之人共為教也自洒掃應對以至道於德性命自正心誠意以至於治國平天下而所舉無或異之道大司徒教民而賓興之則又以六德六行為先而六藝特其末耳然則古人之先後本末不容逆施故士窮則獨善其身達則兼善天下古之盛時所以治隆俗美而非後世之所可及也自今

京師達郡縣莫不有學而大比之歲衿袍四集每郡縣不下萬人視三代豈愧哉特其所學者後其所先而末其所本故自羈紲成童父兄之所教詔不過文辭之聲病對偶之工拙而已使之囂然有干祿之志暨其長也其進益銳苟可以悅時好者無下為而在上者亦以此取之也至視道德性命以為迂遠不切之談甚至羣笑而聚訕之故其未得也則志於得既得也不勝其患失之心階升級歷矻矻不厭固無望其澤加於民或者身寵位高乘之以與民爭利則其中之所存視古之所謂學者如何哉今郡侯增廩養

士諸君相與從事於此伊欲慕古之學則背於進取
徇今之好則何以還三代之盛請擇於斯二者

策問二

禮者天地之大經人道之大本三才之所由以立者
也蓋自天高地下萬物散殊而禮制固以行乎其間
古先聖王特因天地自然之理以開人文垂世法使
天下相與從事乎其間亶亶焉而不倦者也而後之論
者反以為強世何也吾夫子之告門人曰立於禮至
於他日所以語其子者亦曰不學禮無以立則夫人
之所以為人者捨禮固無以自立矣聖人之視禮

如此其急也而世之人固有終其身不知禮為何物而亦足以並生於天壤間者何也先王盛時大而人倫之序否名位之等小而揖遜登降之容周旋謁襲之節事為之制物為之則然後足以維持國家經理世故而後世典章法度蕩然掃地亦能以維持天下而不至於大壞者又何也然則禮固可置諸無用之地乎秦人滅學禮經盡投諸煨燼漢興收拾遺文所謂典禮者不過遺文之職掌而三代聖人所以經紀三綱五常品節朝會聘享者初不在是所謂禮記者乃諸儒習傳記之文所以失禮之大義而非禮之正經

獨高堂生所傳十七篇乃禮之正然其所存者不過
士禮耳而公卿大夫天子王朝之禮皆無傳焉朝廷
欲舉一祀建一宗廟草朝會之儀議封禪之制則甲
可乙否彼是此非名為聚訟迄無定論 國朝承五
代廢缺之餘稽古禮文事固多缺畧自 建隆至
慶曆未有能舉祀神之禮者況其他乎 南渡之後
庶事草創無復舊章雖朝廷博士老師宿儒亦莫有
知其原者每一舉事則惟有司樂工之是聽而況山
林之士將欲衷先王之禮以脩其身齊其家又何所
據依乎夫有德無位有位無德皆不敢制禮方今明

聖在上賢俊滿朝則有其人矣功成作樂治定制禮
今邊事寧息年穀豐登則有其時矣伊欲酌古御今
上自天子下至庶人由冠昏喪祭以達於郊祀宗廟
立為定式作宋一經使天下日用而世守之以大復於
先王之舊而一掃數千年之陋習如之何而可諸君
博物洽文古今典禮講之熟矣幸詳著於篇與夫先
王所為不可廢而後世廢之而無虧於事者其故安
在有司願為聞焉

策問三

國家張官置吏所以為民也今之上下惟以簿書期

會為急務財賦趣辦為能事至於賑卹撫字之意雖屬
守宰亦迫於勢而不得盡施焉古者有布縷粟米
力役之征上之人用其一則緩其二所以重民力裕
民財也三代而後征取無藝惟租庸調之法為庶幾
焉其法大抵以人丁為本故有身則有庸有家則有
調有田則有租及開元以後戶籍不更造丁口無所
考楊炎作兩稅始以資產為宗有身者不復庸有家
者不復調而賦役之輕重一以資產多寡為率我
宋因之為定法自經界之制不行於偏方豪右之家
田連阡陌而資產之數什不二三貧民下戶業已去

而產獨存則是資產又不足以定賦矣且丁役既均於兩稅矣今兩稅之外又有所謂免役者焉貧無田者耕富人之田而輸其太半之入則凡官府之需皆有田者供之矣今客戶編氓甫及弱冠則又有所謂丁口之賦無一人得以幸免今之鄉役所謂保正者又出於丁役之外其始也本祖周人相保相受之遺意自管幹烟火警懾盜賊之外無他事也今催科之役則任之追呼之役則任之逃移走免之戶取償焉至於舟車之算竹木之稅蓋出於漢唐一時軍旅倉卒之需而非其治世之經制也今之州縣率仰此以

補常賦之缺蓋每月則有板帳之常供每季則有經
總制之定額是二者非出於鑿空橫取則無以足其
數則所謂額外之需無名之稅殆未可以遽革也凡
此數者或他郡之所無而此邦之民獨罹其害為父
母者寧忍坐視而不知卹乎諸君目擊其事且親遭
其弊矣幸折衷其稅

策問四

人主無他職惟辨君子小人以進退之而已然君子
小人之際至難明也蓋大奸似直大倭似忠一不加
察未有不以邪為正以是為非故盡言庸違非堯舜

之聖不能知 聽言觀行雖天子亦必有所懲而後
悟蓋嘗攷古人觀人之法在唐虞時則有寬而栗剛
而毅之九德在孔門則有視所以察所安之三法立
九德以為目而察之以三法焉則君子小人無所遁
情矣然後世之君未嘗不欲持此數者以律人及其
用舍之際往往易位何也因是求之聖賢之言則知
本末流源蓋有所自皋陶之謨曰亦行有九德亦言
其人有德而夫子之告哀公亦以取人以身脩身以
道為言聖賢觀人必本諸吾身行立而身脩則此心
所存如水之止如衡之平君子小人容有不分黑白

於胸中者乎恭惟主上即位以來躬行元默加以
恭儉不務游觀不適聲色則身可謂脩矣誅夷元惡
奮自獨斷擢用名流真之高位則其柔立強毅之行
可無愧於九德矣則以之而任人宜在高位者皆君
子矣而治效無異於未更化之前或者猶有疑焉何
也伊欲真材畢用而治效有觀於前何道而可幸索
言之以觀諸君正大之學

策問五

節義盛衰足以觀國君子於東漢有攷而重於世變
傷焉咸靈以來士大夫以名節自高爭相標榜擊搏

姦邪無所回撓似足以挽回漢人之生氣而黨錮之
獄一興朝廷大臣促辱於宦騶之手海內名流竟死
於逮捕之冤直道雖伸於一時而首領已膏於蕭斧
彼漢君其何忍負天下之士哉南北部之分始於甘
陵汝南成於李膺張儉而君厨俊及之號為世之所
指目究其所由來則謠言之興天下爭慕之如國師
獲印畫諾坐嘯之語波流相翻一唱百和以舍生為
身後榮名以括囊為首鼠畏禍卒使閹腐得以部黨
籍口而為斥逐之階天子不辨邪正發憤震怒而益
姦亮之志杖牽條蔓淫及非辜根連株連悉歸獄寺

忠良含冤同時被繫者六七百餘人海內塗炭橫遭
憲綱者二十餘載試即當時之臣而考之如陳蕃李
膺高亢之節未易沮撓而謀誅曹節侯覽一戰不勝
卒以身殞豈二人無沈鷺雄深之謀而徒矯亢以為
高歟抑小人之姦回未易測識固當深謀而默制之
歟今觀露章於左右今諸奸臣知臣疾之之語毋乃
失之疎及其機事一泄攘臂奪呼將官屬拔刃而入
承明母乃失之躁夫豈知齊威以節制之師寺人貂
猶漏師於多寡魚周勃北軍之入亦惟有酈寄以為之
內應而後可以保其軍士之左袒陳仲舉於此寧不

長慮而却顧耶當時之士被其容接者為登龍門則其禮失之抗乞留五日尅殄元惡然後退就鼎鑊則其計失之迂夫豈知位居上公袂握髮以下白屋之士東征三年然後可致罪人之得李元禮於此何不反思而審諦耶乃若范滂南陽之歸從車千兩聞督郵至抱詔而泣曰此為我也即日詣獄縣令郭揖與之俱則曰滂死則禍塞何敢以罪累君其視張儉身為黨魁亡逃竄伏其所經歷被誅者以十數宗親一皆殄滅郡縣為之殘破者焉可同日語耶夫以陳蕃李膺雖足以為百官之領袖而無救於一身之存亡

范滂張儉雖足以為一時之名士而是非有霄壤之異
其餘抑可知矣然則徐孺子之不受公卿辟召郭泰
之不為危言激論申屠蟠先知其禍而潛遁其出處
之節果孰得而孰失請併論之

復齋先生龍圖陳公文集卷第七

復齋先生龍圖陳公文集卷第八

銘贊箴戒

趙縣丞師洪擇善齋銘

人心於善知之必明厥見不惑擇焉始精道既在我
云胡不行顏氏得一拳拳服膺執而勿失庶幾有成
惟知仁勇一之以誠不免曷至用諗友生

王主簿德嘉於安溪簿廳事之東為讀書室某
名以念齋而為之銘

道不遠人欲之則至心苟不存則為自棄人亦有言
聖狂質異質以念移本無定位於戲敬哉益勵乃志

復堂銘

惟民生厚因物有迂罔不在初前賢格言過不待貳
顏氏之賢小而辨物不遠為先人欲之生如火始燃
不撲於微烈彼燎原基於寵榮豈悟躡顛陷穽始悔
舉世而然孰若明哲儆在事前念慮所萌隨起隨窒
豈曰要名庶幾無疾不媿俯仰其生也直嗚呼小子
拳拳勿失

硯銘

正而方君子之操溫其潤君子之德重不可轉類君
子不枉己以從人磨不可磷類君子守剛而莫惑不

鑿其池，壑而雨，滋所此物之所以蒙其施而不知者歟。

建安真景元以開禧改元中博學宏詞科上訓
辭有曰勉之哉毋矜而能毋競于進朕將觀汝
致遠之器因擬致遠以名齋友人莆陽陳某敬
為之銘曰

在昔君臣	相得益章	都俞賡歌	庶事用康
皇乎我宋	接受精一	羣材彙征	教以寬栗
謂士致遠	器識為先	弘毅任重	前哲言然
譬彼鉅舟	負山絕海	一瞬千里	不負厥載
吾儕狹中	輕媼易喜	載沉載浮	曷其有濟

其審厥道 利涉大川 義以為揖 仁焉是公
雖實若虛 庶乎屢空 子豈獨安 民將與共
四海之大 維子所持 一失則悔 子寧勿思
赫赫皇明 遲子有成 翔于治庭 邦家之榮
猗歟盛哉

朱墨銘

莊敬和樂中正仁義
意必固我克伐怨欲

朱屬陽墨屬陰一日所為驗於中夜凡屬陽者幾屬
陰者幾直積力久使無一念之不陽而陰直冥之空

虛不用之地故天之陽不能不陰君子之道御之則天之陰雖長而吾心之陽未始轉而為陰也如是則天下常泰而不否矣

贊梅溪王先生像

先生之道得天之全氣剛以和如四時然功在王室惠畱於衆不怒而教惡遏善遷為政以德信哉格言先生之逝四十三年有廟有祠民奉益虔紫帽可礪清名不騫

贊文公朱先生像

貌溫而嚴德剛而粹春融秋肅淵澄岳峙道光二程

識高百氏生遇明時進難退易天假之間斯文大備
偉哉夫子教垂萬禩

贊勉齋黃先生像

貌之癯有願之樂氣之剛得軻之養以身任道老而
益壯仰止朱門孰出其上

座右箴

志於仁則言色不巧令志於道則衣食不耻惡

戒樂

樂以可久為尚使其一時之樂足以貽無窮之悔則
莫若淡然無樂之為樂也簞食瓢飲非真樂也久而

不厭者樂也聲色外物人之所樂也樂於暫而悠於久也是以古之君子身便絺綌而不願乎文繡之夸口甘齏菹而不願乎膾炙之美蓋求其可久而已紛華之靡目利欲之牀心而日久不為災古無有也

溫陵梁氏習軒說

自天命之性率性之道而下則有教焉是天之所以命我我之所以事天者非學不可也魯論一書首以時習為訓門人相與傳之則習者又學之所先務也時習之義先儒注釋詳矣無瑛贊述獨有不倦二字可以近似因觀曾子吾日三省吾身之說則知日省

工夫猶有未盡不如時習之為無少間斷也苟念念
不忘無一息置距聖賢堂與何患遠哉清源梁兄德
陂以是名軒求說於某自惟淺陋無以塞請俾歸質
諸朋友以見教焉

東萊呂氏官箴以覓舉求上官保庇書為第一
戒今仕者往往十犯八九雖賢不免陷焉為詩
以謝兼用奉勉

凡厥女子號為無知十年不字遲歸有時正節必守
淑行懼虧孰謂君子身不自持不良其背顧朵其頤
自驚苟售寧不怵莫答盛意聊贈鄙詞

字圭子說

圭年十八既冠予字之曰表夫蓋刺韓子崔羣制中語且告之說夫圭之所以為世寶者以其德也古者自上公侯伯莫不秉是德必曰溫良鎮栗剛正平直然後為美一毫有玷皆足為累可不謹哉汝其孝於親忠於君睦於族信於友恭於鄉黨臨事敬臨財廉乃能如昔之君子在家則為一家之表在鄉則為一鄉之表等而上之所表愈大始稱吾命汝之義其再思三省勿惰勿嬉以成乃祖父之訓

字李如晦說

孔聖有言四十五十而無聞斯不足威也已又曰君子去仁惡乎成名然則聖人誘人以名者將以勉其實也自後世之士有不務實而務名者往往見非於君子而忌且急者遂乘之以便其私凡自力為善者一切以好名譏之其弊至於使人安心於卑陋而絕意於高明寧逃謗議恐目沽激必使天下無一君子而后已是驅人於為惡也可不畏哉夫名豈可以苟得末有不自務實始蓋善必充實而后可以至於輝光美在其中而後有以發於事若夫無實之譽過情之聲安能久欺人哉鉅野李生彰雲龕文肅公之孫

年少銳志問學往來數年愈篤不衰一日以書請說
其字如晦之義以自廣辭不獲乃為之說曰子患乎
實之不修不患乎名之不著名著矣又能晦以自處
然後其名愈遠譬之日月必有崑崙為之隱蔽然後
其光終古而不疚子姑汲汲於道問學以充其實勿
問名之顯揚則又進於人一等矣

復齋先生龍圖陳公文集卷第九

記

蒲學朱文公祠記

孔子所以為萬世師者學不厭誨不倦而已此二者其事若易而實難其功若小而甚大非至聖大賢不足與比近世有儒宗其好學也不惟獨得於師而博采四方士友之長不惟自有諸己而下取一介賤微之善大而天地陰陽之運小而鳥獸草木之情精而道德性命之源粗而度數儀文之末二帝三王之道孔孟周程之心既有以默參之與下至諸子百家天

宦地志兵機律歷莫不窮其理其誨人也無知愚敏
鈍貴賤疎戚隨其才性曲如誘掖平生宦游之日少
家居之日多自朝至暮自少至老孜孜矻矻應接不
休有問斯答如響應聲著書垂訓易簣而后已嗚呼
若文公朱先生者可謂之學不厭誨不倦非耶此祠
堂所為作也先生諱熹自稱晦翁謚曰文其所著書
數十種而為尤切於世教者曰大學中庸章句或問
語孟集註近思錄家禮小學家傳而人誦之莆雖最
爾邑昔稱士鄉先生初仕於泉及淳熙間凡三至焉
趨風承教之士不少先生歿廿二年矣前輩往往

彫謝晚生益知向慕校官陳君汲好者君子也既刊
前諸書以惠後學矣謂誦其書不知其人可乎於是
即學官而祠之孟秋告成率諸生致敬焉堂宇斯邃
遠像有嚴及識先生者如侍大席之側且悲且喜未
學小子瞻望其端莊剛毅寬裕溫知之容反覆其精
微詳密切深懇到之誨可以釋師儒不並世之憾也
矣苟讀其書而不體諸已敬其像而不師其心過斯
堂寧無愧乎陳君謂某嘗登先生之門宜記作祠之
歲月不得辭若夫先生之道所以繼往聖開來學者
可殫述乎

泉州南安縣新學記

三代盛時自家至國莫不有學自天子之元子與諸侯大夫士庶人之子莫不入學當時弦誦之聲相屬於都鄙鄉黨孝弟忠信禮義廉恥家傳而人習也今國家崇尚儒術俾郡縣皆得立學縣顧可自菲薄而不加之意乎泉負郭之邑二曰晉江南安南安距城十五里地大士衆學官往往自昔簡陋紹興丙寅宰劉孔脩由邑東徙於黃龍溪之左乾道戊子令朱端章加葺焉規模狹隘庭下不容旋折寶慶丁亥秋太守建安游侯九功割俸金四十萬俾邑令三衢毛

淮撤而新之令以諉主簿三山謝觀國於是同僚學
職生員至於鄉黨好脩之士揮金獻木遜地買鄰僦
役於旁郡而民不知以昔之夫子殿褊迫庠下邑
為講堂築講堂舊址崇四丈尺殿之前戟其門以應法
式西闕四齋以處生徒東建重屋以庋經籍垣以堅
石外密內寬視昔增倍而雄固精緻高明爽塏有非
官舍所可髣髴郡邑壯之以為百年所未有而成於
一日某因事過其下驚所創見蓋二紀前嘗為吏執
經周旋其間病其太陋者也今烏得不喜而主簿與
學之秀士羣至俾某記其事辭謝不獲則告之曰某

聞之朱先生曰夫所謂聖賢之學者非有難知難能之事孝弟忠信禮義廉恥以脩其身而求師取友誦詩讀書以窮事物之理而已諸君汲汲於學凡以是為本推其用有不可勝窮而祿在其中矣若夫恥文藝之不工記誦之不博而芒芒焉以欺世盜名趨利苟得為習舍靈龜而觀頤朵視金夫而不有窮豈國家崇儒之本意聖賢設教之本心哉諸君其以朱子之言是師不唯不負賢守令作成抑又有以副父兄國人之所願欲顧不偉歟為費摠六千緡閱九月而竣事器服稱是游侯蓋游先生之族子有惠政邦人

德焉分董是役者凡十人惟志同而業專故事速而功倍曩時衆人不憚金帛往往靡於釋老神恠之祠惟庠序之脩必待於官未聞有捐私帑者豈惑於為善徼福而然歟以今觀之為善徼福未有若致力於庠序之為速者庠序脩則孝弟興而風俗美善與福孰大於是乎以見衆人好善之習日異而歲一不同也予既喜學官之成又喜士俗之變於是奮筆而書於戲三代之盛安之不由今而見於他日乎

懷安縣學四先生祠記

夫道之顯晦也有時而天之生聖賢也有意不然何

其前後若合符節也竊謂濂溪猶夫子生於周也二程之於周門猶孔門之有顏曾也顏曾既沒而得孟子猶二程沒而得朱文公也其道統之傳或見知而親承或私淑而遠紹今猶昔也自周公沒而聖賢之道不行五百餘年篤生將聖時則有若顏曾二子得於觀傳又百餘年申韓之術楊墨之言充塞斯民耳目而敗壞其心術者甚矣不有孟子則孔氏之道幾墜於地孟子歿由秦漢至於五季吾道壞亂者千三百餘年逮濂溪周夫子道由天畀不假師傅獨得孔孟淵源之懿於絕學之餘使道統斷而復續人心塞

而復開明道一挹其容心領神會而得吟風弄月之
深趣伊川一聞其語自少有志而以任重道遠終其
身斯蓋周門之顏曾也周程既沒一時高弟雖各得
其一體而未免於有偏又百年文公朱先生復起講
明義理則必察於毫釐錯綜羣言則力辯於疑似使
周程之道炳如日星而異端邪說無所容其喙其有
功於周程真如孟子之於孔子也今雖家有其書人
尊其學然所教非所取所取非所教詞章利祿之習
勝而四先生之道不絕如髮則反本復古之機顧本
繫於人歟懷安為三山望邑學官雖具庖廩不繼為

令者春秋奠享外未嘗過而問焉是以章甫其冠逢
掖其衣而有志於學者比他邑為差鮮令君嚴陵徐
琢為治知所先後慨然興起葺舊增新創四先生祠
延文公之徒講貫其書集者數百人凡四先生所以
追往聖繼絕學而發其所未發者皆以次陳之聞者
莫不喜曰吾道固如是吾所學可不如是乎蓋聖賢
所以垂世立教者固將示人以入道進德之方脩己
治人之術而區區舉子之業特假以釣名干祿而已
吾儕終日讀其書誦其詩不知聖賢之心可乎知此
庶幾無負於聖朝建學之意賢令作成之美則是祠

之設不徒俎豆觀美而已衆又有請曰人心方興而
未固道教方明而未習令政成終更纔數月爾俾某
記之以壯今志而勉後來於是述道統興廢之由與
建立新祠之意使無怠焉

黃勉齋先生雲谷堂記

某少時侍先公正獻每令誦文公朱先生書淳熙
間先生來訪先公於敝廬今仰止堂即其寓館某時
與弟宿立侍未有知也厥後思見先生而不可得聞
勉齋黃先生盡得其道宦遊江浙又不得見嘉定
丙子歲某自外府丞丐外得壘南康道出建陽拜朱

先生像於考亭精舍遂獲拜黃先生師焉先生不鄙
示以問學大端既而先生守皖山共歸則戊寅歲也
又明年某自廬陽歸拜先生於箕山精舍居數日聞
所未聞先生曰予蚤歲唯師是從師以別墅畀我今
始能為堂三間命曰環峰乃吾考察院祖居山名也
察院清貧故廬不足容子孫先生至是歸寓三山之
浮圖舍而得地於箕山建小樓以禦風嵐携書聚徒
其上距城三十里所以專其業也命曰雲谷蓋取朱
先生隱廬之舊名也俾長子居環峰曰無忘爾祖之
訓也俾中子輔居雲谷曰無忘爾外祖朱先生之訓

也命某書其榜而揭之先生卒三年輔曰先生之意
欲爾記焉退惟愚昧辱先生之愛素深其欲固辭因
嘆往年侍坐時與潘君謙之俱至丙夜皆疲思寢先
生方研墨著書益精明不倦未明已起矣二人皆曰
先生壽未艾斯文其昌也豈謂曾不一年而先生歿
耶設知先生之卒則雖千乘公相亦不願就以輕去
師席也銜恨千古悵悵無歸年益衰學不進方將謝
事就閑往來雲谷環峰間訪二先生之後相與讀遺
書而講明之庶不悞父師之訓輔字子德孝弟力學
又吾友也請不倦書以貽之且交相勉焉

潮州八先生祠記

聖賢之生斯世其存也則行道於當年其歿也則垂教於後世夫道行於當年功止及於一時教垂於後世其功與天地相為終始自孟子歿斯道不傳千有餘年我宋濂溪二程橫渠先生闡而續之至朱文公張宣公呂成公一時鼎立更相發揮窮極奧眇聖賢之蘊用以大明於世不幸中殂文公享年獨高旁稽傳考易簣不休於是斯文始克大備學者咸宗師焉槎溪廖公朱門巨擘嘗佐郡於潮觀風一路首倡斯道教誘後進剷除宿弊以惠邦民人尤思之先是

郡庠祠前所謂六先生矣紹定戊子大理正孫公承
命出守行其素志從學者所欲增闢舊祠繪成公槎
溪二公而八之廟像有嚴使在位者知所法而善其
政游學者知所慕而尊其道於是闔郡歡然趣尚益
堅遂使聖賢淑人心垂世教之志真與天地相為無
窮為惠豈淺淺哉公名叔謹臨漳人累登科第忠厚
懇愿下車二年羣廢具舉脩學宮新岸獄建思韓堂
割俸為之猶以為未足而寘力於是苟非真知崇尚
名教慕用賢哲何以不怠若此近世異端之祠充斥
海隅尚賢之舉不少概見故重為之歎云

廬山重建李氏山房記

某少時誦蘇文忠公李氏山房藏書記恨不得造觀焉及假郡紱此來又以職事無因而至嘉定戊寅秋七月友人方侯信孺以前淮南東路轉運判官東歸取道廬阜奉親避暑窮泉石之勝至楞伽寺昔之所謂白石庵者問山房之故地荒烟野草景絕迹滅為之喟然長歎曰茲山佛老之廬所在錯峙獨所謂山房乃無一好事者復作焉何以寓仰前哲誘後學之意於是退搜旅橐割金錢十萬俾某助金亦十萬又貽書江右帥曹公不移時得緡如其數於是諉其殺

於是之主僧普誠閱八月而後成為樓三間闕裏虛
敬其下為堂可燕可憩方侯既歸屬某紀其事抵鄉
又以書來趣益力明年四月某行視阡陌竊一至焉
拜李公之像徬徨瞻睇見其山清麗而聳正環抱而
空曠問樓之新舊孰謂小大僧曰以新抵舊大三之
二因歎山深則境寂樓小則得一意讀書此昔人所
以成名今人結廬人境崇深侈麗外眩中移宜其講
學之不專其勢然也又自歎汨汨朱墨真成俗吏而
規恢復觀乃出於過客邂逅之際使百年廢跡煥然
一新人之才其相遠如此哉既書以荅方侯勤壑之

意因刻石山間以遺後人且以書數種寶之若夫九
千卷之藏必有能足其數者

林氏兼山閣記 名羽

三山林公其從學晦庵先生最久之足以發義理行
足以激懦貪茆假守延平屋致書院朔望講習設執
經帖然座下者嘗百餘人如是者一年茆官將滿浩
然引歸諸生挽而留之不可所居號龍門三灘得全
仁智之好一日以書抵茆曰吾為重屋命曰兼山謂
一歲之勤止於冬一生之勤止於老此茆之所當止
也言戒躁妄行戒輕肆讀書期於明理窮達安於有

命此兒輩之所當止也若夫寂然不動萬理中涵靜而止也感而遂通物各有則動而止也此聖賢之能事某竊有志焉而未之能也子為我記之某自惟寡陋辭不獲則曰易曰艮其止其所也謂有當止者則惟恐其不止如君仁臣敬父慈子孝友信之止是也有不當止者則不嫌於不止若子謂顏淵未見其止語之而不情是也蓋學無止法唯不止然後能得其所止此又卦外之意而吾夫子之所終身不厭不倦者也學者不可不知某病不能鞠躬請教以是說獻他日仗屢登斯閣求訂未晚

鄭氏家塾記

某常歎今之學官與古塾序異古者本行而末文今學者反是謂宜教育推擇必兼行誼而教官拘設文法自課藝外雖有孝弟忠信道德純備者不在是選豈古人建學之本意哉非少復古何繇善俗此近世有志之士欲為而未能者仙溪鄭君鼎新以儒生首創家塾於其鄉所以為教以德行道誼為先蓋其人忠信好禮見道明而自信篤卓然不惑故能為人所不能為如此孔子曰仁者必有勇又曰見義不為無勇也若鄭君者所謂仁勇非耶他日有志之士推廣

而行於鄉閭族黨誦相聞禮遜胥作於以助國家
化民成俗而復三代明倫之本意安知不自鄭君始
君方入太學其以是私淑朋濟必矣示某以記文俾
書其後何敢辭

仙谿喻氏大飛書堂記

人不能無好能無詭於流俗則幾矣權者古人之所
避今也則惟恐於己不得當焉利者古人之所恥今
也則唯恐於己或有遺焉至於聲色也宮室也口之
所味身之所器不侈不已不則以為大惑之人也吾
未見其能好也若山水之為物其清也足以怡神其

駛也足以發志孔子謂非仁知不足以樂韓子亦曰
王弘中之德可謂與好協矣夫豈固為沽激矯亢之
行寂寞枯槁之事也蓋性之所嗜舉天下之物不與
易而後謂之好凡物有可喜則有可愕惟茲好也愈
深而不愈厭然世之真知者幾何人予友景山喻君
其所好蚤與世異蓋天德也力學不倦志古而嗜幽
居邑之廛非雅尚也一日登其邑之大飛山豁然心
舒瞭然目明妙得勝處亟以今名請書於崇清陳公
而刻諸石因堂焉其山延袤而來以襟以翼奇石錯
拱或壁或屏方臺東峙小飛西崇文筆銅鼎直西角

列堂深四丈廣倍之左曰藏脩學優而遊息也其後
為六君子室右曰耕養帶經而菑畬也其後為三益
友寮室與寮所以上論古而端取友也外列三室東
曰轉煥西曰濯清以須寒暑之至也結亭於東南隅
曰對青以供四時之矚也堂下有泉夏冬不枯清可
鑑甘可飽也少右為坡上可平田數畝迂百餘步飛
瀑鳴於兩山之間委折數四平處可環坐而飛觴魚
鰕往來戲客酌取不獲者浮之大白以資戲劇朝晴
暮霽月出風行奇姿異態率以詩發之人知君之廬
此山為甚樂而不知君之有此山為甚難奉甘旨外

私淑諸其徒銖鈔所入以澹斯役冒衆人之所嘲笑
而為之經始於丙寅歲六月之晦迨己巳歲八月而
後成事不要其難考其終不足以見所好之淺深誠
偽世固有無所能為老朽且盡不得已而為之猶中
悔者君嘗與計偕矣聲名日起春秋未四十慨然不
顧流俗從事於一世之所不好景山乎子其殆庶乎
古之仁知人者予惜縻薄官廿年才一再調不能釋
去以從君游愧君之勇幸辱交君慕君之志他時結
茅松峯與大飛相望百里春樹暮雲乘興命駕山有
野蔌杯酒相屬各以所得相質其樂當何如君如

所志矣予則塵望未可期雖然君能如所志不替司成陳公高築室藏書茲山之下距今六七年矣君適昏其族得其故書曰大飛家藏者寶識其上今復歸於斯堂君又能盡讀其書則為司成之所未為者其可量耶予重嘆其非偶然者故喜為之書

梁氏玉峰書室記

玉峰書室者淳熙丞相鄭國文靖梁公未第時讀書室也室之廣袤不尋丈簾帟壓闌闔中門外之屨通衢之車衝衢往來居其中者一坐九起能恬然閉戶移時竟晷者百不一二分乃讀書其中朝暮不倦

視喧猶寂視盡如夜蚤惜寸陰夜繼膏火卒能成大
名都宰輔為孝皇名臣然則發軔植基此原本也
公之姪孫某實居其處謂莆田陳某曰吾叔祖文靖
之薨距淳熙今四十餘年地如闕矣向之雙檜已蒼
然數仞矣獨吾未有以自見於世子其張以數言使
吾自勉而竭焉某告之曰為人子孫能知父祖之所
由興者日用其力焉則公侯復始之語古人不予欺
此無他在立志貞與晚而已爾陶淵明有曰貞晚由
人請以此言為記梁君曰諾

安溪縣贍學由記

嘉定三年夏五月給事待制鄒公作藩于衆秋某試
吏屬邑始至謁先聖於學官進生徒而告之曰邑無
小士之成材必由學今天子仁聖視邦選侯玩印
踰年始得公蓋將以文風教而作新斯士士幸生斯
時苟於學有不便者令雖卑猶能言之衆曰此邑之
士咸知鄉學比年決科項背相望命鄉論秀裏先諸
子非學有教養然與然教養之員僅及三十庖廩每
患不繼道浮屠有廢寺曰上乘豪右陰擅其利孰若
請之州即輸租之贏者儲諸學所謂惠而不費主簿
趙時傳實主學饒朋翼其成會某入州白其事公立

許之無難色袍衿相語少長嘆欣越時藉其晦歲可
得穀四百石養士增至四十弦誦之聲春秋不輟衆
咸公惠之宏謂宜有詞以紀某曰公之立朝大節見
於進退之際其登瑣闥也風采益振人皆期公不日
東事樞矣一語不契毅然引去其操行如此及來鎮
茲也下土車蒼年制定始成風化所關尤所篤意營
經閣於郡庠建議齋於海鎮崇禮尚義人用大勸其
政教又如此諸生幼學壯行誠宜以公為法況公以
天下重望不鄙令不肖一請而從之則所以待諸生
之意可見諸生坐於堂得不思進德脩業以期無負

公之意乎傳曰一家仁一國興仁其機所在雖小必
大今所增者十士使皆因是以動其機於以風天下
何有況一邑乎苟如此上不負天子下不負所學其
忍負公衆請書是以為記

安溪縣惠民局記

安溪視泉州諸邑為最僻深山窮谷距縣有閱五六
日乃至者又氣候多燠春秋之交雨汁則河魚腹疾
早則瘴瘡作焉俗信巫尚鬼市絕無藥者有則低賈以
賀州之滯腐不售者貧人利其廉問服不瘳則淫巫
之說益勝於是病不藥不夭闕幸矣嗚呼獸且有

醫而思吾赤子誕於丕愚於賈哉嘉定庚午冬始為
和劑局於中門之內招明醫一人躬診視脩製之事
吏一人佐焉掌凡出入之籍工一人供凡役辦惠民
局於大門外一吏掌之月一易所以易其勞革其奸
也主簿兼督之所以重其事也夫掌民者使民有疾
無醫有須不備何以為心乎後之君子孰無是心惟
以是為民命所繫敬而無怠務廣本朝仁民之德
而不屑屑於計利則不獨人享其福已亦與有天地
鬼神不可欺也實可畏也本錢五百緡歲取贍安養
院之餘者增入焉

安溪縣安養院記

古者鰥寡孤獨疲癯殘疾皆上所養也 皇朝詔州
縣立安濟坊居養院實三代遺意州縣奉承職所當
舉安溪距城百里斗絕一隅地無重貨商旅不至唯
貧困無聊之人僦力執事往來山谷間地勢幽阻秋
冬之交疢作相望悵悵無所栖其或得託廬以息而
居人恐其或死累已驅去之唯恐不速以故羸困類
頓往往不免官無繇知某來茲一年目所傷惻乃相
地於近縣西南立屋十四間庀湑粗備名曰安養院
以待之擇釋徒忠愿者二人謹視之取廢寺之粟歲

若干石以粥之為惠民局於邑東以藥之病瘡則裹糧以送之不幸有故則官歛以葬之盡心所及盡力所為庶無負聖天子仁民之意嗚呼民吾同胞今又其司命者也使至此罪將安歸某始至不即為其罪固已多第勉勉以補過於後後之君子至則廣其所不及豈若某之不勇以致悔哉於是書之以俟

安溪縣龍津橋庫記

儒者以利物為義釋氏之學病在絕物今有釋學而儒行者君子將取乎否也曩時僧了性號雲庵戒行服人以濟眾利物為心人慕之施與不容平生功績

顯顯在人耳目最後為安溪之龍津橋費鉅萬計其弟子惠源宣力居多雲庵既化惠源結庵橋側苦行化食與其徒共守而特葺之邑人愛之如其師某宰邑踰年顧縣治敝甚木腐瓦缺不可支風雨則執蓋其下謀一新之乃語人士咸曰必欲善其事非惠源莫可任者乃俾市材於鄰邑而經營之不數月告成廳堂廊廡棗桶蓋級心精緻不苟一出其力而民不知未能用其師之道有功於官民如此亦髣髴於儒行之近似者耶則其徒不宜使之憂衣食況物久則蔽必有生財之道以聚其徒徒之安橋之固也乃以俸

金百緡及募於人者百緡為局於通衢因民之息為
民之利於是喜而為之書

安溪縣桂湖巖記

環奇之觀必在於幽遠之地故常為學佛者所得安
溪號佳山水其絕勝處非去三十里曰清水巖善利
大師之所廬也予嘗禱而飲觀焉出邑四十里而西
曰桂湖巖聞之里儒林君巖夫居焉林木鬱茂一澗
出其中澗之中有峰崒然獨起銳如筆蒼如玉水環
其旁鳴號仙人亭又號香爐峰相傳有仙靈跡五代
間性空禪師栖焉化於盤石之上其後為虎蛇區者

三百年我 宋淳熙己酉人了圓剪荆棘閱寒暑以
跡之始得所謂盤石者止其下又獲古食器意前
人之所居乃結茅以避風雨鐘樓羅漢閣以次對峙
煥然一浮圖寺其徒疏餐力作斲荒山蔣姜植桐以
自給不汲汲求於人了圓年六十餘強壯時已不下
山童顏鵲髮居常怡怡其徒敬之林君說其境美其
人求予言以記請再三不倦予因自數年近五十班
鬢作吏一毫無補於世使少年時築室湖山勝處左
詩書右筆視其所得豈易量耶乃今塵埃撲面舉業
枵然曾不若斯人擅其樂以有成立如此於是書林

君之言併述予之所感以授之以見學而無成真有愧學佛之徒者也

安溪縣埔陽廟記

某為縣之二年縣人告埔陽神祠頽厭謀易新之官為出錢三萬鄉之大夫士率農工雜成之三月乾事費省功倍民樂趨故也父老言神禦災捍患耿不可誣廟號未立衆深以為恨曩時縣上之州州列之轉運使以神之名氏前碑不載首事者不能旁搜幽討以故輒格不得上達今棟宇一新顧瞻其額無以揭虔著威其可不搏心以求其所謂名氏者乃祝而求

相焉明日有童子得故籍於家者老見之驚喜以示
令紙故敍載其事甚詳人所不能猝為也云邑故多
虎唐中和四年有老父姓安名寧搏而殺之虎為遠
遁寧歿邑人祠之患遂帖息嘉定辛未秋虎復出境
上令禱之神曰昔人政事之善蝗不入境今貪且暴
宜爾且令到官與神約聰明不及神則相之貪以害
民神則殛之其忘之耶今違令之罰而出猛獸以害
人將誰責耶已而射者中二虎曳箭死于深藪積雨
漂其骨以出乃知神之顯靈於人若將求天子之寵
命又以警戒名之不謹者不然則令之不德無疑也

某既為上其請於州父老以狀告曰是廟於吾邑獨
尊且久又始封於朝者也求言以紀之某將歸不能
睹大書之褒以答父老之望姑為之記而缺其顛以
俟

安溪縣丞廳題名記

親民莫如令繇漢以來必置丞以貳之曰丞者贊助
正救之云耳今有疑必咨於丞丞有言必忠於令事
或便民議而行之少有不便止之唯恐或後可石相
濟不立私見唯是之歸丞苟得人令亦寡過然則丞
之任其不輕而重審矣安溪地踰百里荒遠而民貧

令於民事固當究心丞於邑事尤不當坐視而不之
告也然居其職者往往參以關市之征曰吾能寬民
薄歛足矣至於邑事弗理則曰非我也若是而曰不
負丞可乎趙君彥寓秀出天潢為善好學再轉未丞
不以為屈始視事閱視壁記無有乃語令曰是所以
載前人垂後勸缺而弗著豈曩者薄其職而不為雖
為之而不屑記抑將記之而失於因循也耶吾不敢
息子其為我紀之於是問諸書老得陳君駢而下廿
八人焉賢否高下班班可見夫以一里正之微苟志
於善則一里必蒙其福况長吏而思善於其職則惠

利之及民也孰禦乃今知丞之繫於邑者如此宜賢者之所樂為吾今而後可以寡過矣既為丞喜又持以自賀

南康利民抵當庫記

嘉定丁丑某始至歲大旱聖天子賜粟與金民免流徙德至渥也仍歲中熟瘡痍始平初上便民事其一務城築其二廣庫儲終更有日經費外得錢萬緡糴粟五千斛以備水旱牘隱初心獨城築為費不貲且非一政所能成銖寸所積得緡錢七千郡故有濟民庫蠹壞之餘緡不滿十此年廢之今茲復建民以物質于官自錢百至萬終歲子不過母十之一因以

惠民悉用為子城版築費也數年間不擾民不重費
百雉在目矣有志事竟成況此區區者哉後之君
子國爾忘家奚待予言

西外宗院廳東軒記

睦宗院主管廨舍之東有容膝之地予朝夕在焉號
曰東軒客有問者對曰破屋一間敗壁三面小牕值
南短垣橫亘暑日穿漏風搖雨泊落墜垢面濕蒸在
脚室中之器陶竹交錯客曰如此其陋而子樂之何
也曰樂根於心不在於物世之役物為樂者惑也夫
高宮大廈門戟廐馬人莫敢窺號沈沈者此其居之

宜足樂也然一言之失流弊四海一息之悞千載不
貸且晝所為雖不察之昏晏而退心媿面熱冰盤薦
食不足反汗團扇四列為暑益絆此豈於物不足哉
若夫我之居室則異於是矣一調十年視榮猶衰不
能勇退仰欲怡慈尚資升斗豈利之為所職既簡門
冷如冰造請亦䟽心閑不營雞鳴而起左書右詩以
寢以食不萌一非休休皞皞將見軒義初不異於坐萬
間之下乘千里之風者也嗟乎顏子之卷淵明之廬
極天下奇偉壯麗不足與之較視吾東軒為如何客
欣然而退若有所得予笑而為之書

月樓記

某家小樓南直臺山二十里皆平疇東臨鉅海月出
茲樓最先得久未之名嘉定辛未冬夢天衢有大書
月樓字覺而思之月者人之所同玩而未嘗繹其義
焉在易坎為月不著於大象蓋受日之光凡為明皆
日也晉之象曰明出地上晉君子以自昭明德此大
學明明德之本也又曰月幾望戒其不可盈也期三
百六旬有六日望者幾既望無不虧者唯幾乃吉也
佳宵美晴風雨冥晦當不二其觀即清新曠潔以省
其心盈虛消息以窒其慾茲予之所為玩也若夫會

親友銜杯賦詩又樂乎此者也

松泉精舍記

距莆城北去七里曰飲泉有海山奇觀林壑勝游鳴
泉出焉冬暖夏涼病者得之應時而愈蘇枯醒惛溉
田灌蔬功用莫測予未冠時所遊每至其處見其山
川回環若揖雲海橫陳若繪若畫村居野聚開大畝
之壁壘浪柁風帆列几上之玩具數十百里錯峙交
布面境酌泉眷戀躊躇而不忍去四十餘年於此矣
蓋先壘在龍及每月一至則歲過此嘗十餘度一日
有以其地見害者為畝幾十剔夷草莽石蹲木列結

茅其間鑿石為構引竹注泉命曰松泉精舍距龍汲
十里餘中間有松嶺劉坑二精舍又二十里有東平
瀑布方將結廬於盤石之上以對焉凡可游處有五
足以娛暮年之耳目冀心清而進道云

興化判官廳平一樓記

肯郡濱海有山在南峻極屬天官舍民居必面焉者
壺山也謂不如是不足以出政治豁心目他山雖秀
不敢與盲人莫不仰視然其顛坦如掌平易如畫一夫
巍然高大人之所共見也高而知其平險而知其易
非有識者孰能哉上幕解舍舊號庫陋豫章程君必

東以甲科初仕奉親而來踰年而立重屋於廳事之
後以為公餘讀書之地榜曰平一取見之異於衆者
屬某記之辭不獲則告之曰平者公也一者誠也公
則無私誠則無息君之命樓得無取斯義乎臨民以
公立心以誠則政績卓然為民所仰而處躬謙牧如
履康莊屹屹不懈此又僕所期於君者若夫工材之
細請畧不載

興化判官廳尊美堂記

學始於成己終於成物蓋儒者以有用為貴也一命
之士苟存心於愛物於人必有所濟況一郡之政係

於元察自非學問內充措諸事業未有能善於其職者也甫之為郡官少而事勤居幕中者往往年齒老暮不則識趨凡陋不辭責以苟祿則急利以媚上位故為守者有焦思之勞無蒙成之逸延平姚公以亞魁學傳槎溪源溯伊洛一旦來居是職究圖民事據案終日事無小大皆躬決而上之守未幾郡綱大振民懷吏憚暇日顧聽事之西瓦礫聚焉曰嘻官舍庫陋不蔽風雨其何以為盡心思職之地乎於是輦載鉏冶為堂三間命曰尊美取孔子答子張問政之目大書而揭之蓋有深意孔門弟子問政者多矣孔子

答之未有如此其詳且盡者苟朝夕以是而三省焉
尊其可尊屏其可屏雖推之以佐天子平天下可也
況裨一郡乎顧五美之要在於欲仁苟欲仁矣則四
者皆在其中自無惡之可屏矣庶幾成己成物無愧
於學其願學而未能者也辱索記謹書而求質焉姚
名瑤

晉江縣主簿壁題名記

令之佐凡三丞以偪罕可不事尉又掌循徽一邑版
籍簿得專考焉得人則吏奸革民蠹除國朝唯上
中縣始備官下此則寧省丞不敢廢簿所繫豈不重

哉近世居是官者往往以例破法以私害公凡小利
必趨小過不謹曰毋傷也不知始進以正他日事業
實權輿於此泉為七邑晉江始於郡子城東隅簿解
前此類圯官多僦居嘉定庚辰三山潘君某始撤而
新之未備而去寶慶乙酉冬莆田龔君埴至補其瓦
甓塗墍之屬使全美焉記壁則昔所未有也蒐訪名
氏僅自紹興以來得若干人刻置廳事之左囑某記
之某曰君之祖參政公初筮主南安簿聲華四達厥
後以諫爭經濟號名輔朱文公亦年少簿同安其問
學政事已卓然見重於世先公正獻嘗三薦於孝廟朝

蓋自同安始也今君唯祖父之志是繼文公之道是師毋使衆之簿專美於二公於以勸後也大矣是則題名之意也

興化縣重建廳事記

字氏之官有地百里如古侯國宜仕宦者所樂為也後世居是官者以治賦為急不暇他及視其居如傳舍計日去之唯恐不速故官舍常圯敝其始至也則不暇為將去也則不屑為終更枝梧而粉飾焉以欺後至者天下皆然也興化軍支邑曰興化縣治艸於太平興國四年崇寧間攝令上官植革而新焉又

百三十年歲率一葺十里內丁夫無寧居者寶慶丁
亥冬十一月永嘉周侯果下車二年矣懼屋朽且壓
謀諸父老曰與其民勞而無已曷若一勞而永逸適
連歲大稔官民一心割俸為倡營度材甃因舊基鼎
新之天時晴和工不告病纔兩月告成取財於節縮
之餘役工於間隙之日聽事三十楹外及門廡倉廩
輪奐翬華宏峻爽塏以聽訟則正大而高明以慮事
則深靜而安定至於燕寢之所不易一椽吏民咸喜
曰公而不私賢哉周大夫某數年前嘗欲謁夾漈鄭
先生草堂與鄭蜀公故居因過所謂縣治者顧覽其

山川之奇偉追慕其人物之雄傑以病厄不能出嘗
聞長老言紹興間令求嘉丘侯鐸有善政是時夾漈
先生嘗為民記生祠之碑今周侯與丘同鄉政又與
丘兄弟豈無若前賢者奮筆而書侯不以屬之而猥
以屬某何也辭既不獲於是感今為縣之難嘉侯此
舉之不易強顏書之以勸後之君子俾時肖而歲脩
焉

仙遊縣丞廳記

昔人以官為家居一日必葺況臨蒞百里佐令長以
出治賢則百里之民得其所不賢則反是然則丞豈

真慢者哉仙遊古縣萬家為聚非十室比任是職者
凡令長之政無所不當知將順其善意正掾其不及
官雖次令民於是乎責望焉如是則前任人名氏尚
不可不記諸壁而廳事頽圯置不復問曰姑數日以
待更得不負是寄予三山趙君璫夫以宗英掇科第
寶慶丙戌來佐斯邑逾年適怪雨盲風上穿下墊蓋
更造於百有四十年之前因陋就簡至是不可復支
舊比每任一葺必取工材於浮圖氏遂召其主首而
告之曰與其三歲率一擾曷若協力新之勞於此時
逸於後日不亦可乎嗚呼唯肇役於中秋閱三月而

成端直宏敞一洗昔時偏頗湫隘之陋吏舍庀福咸
備無缺聽訟治賦心清體安凡此皆為民也既成迫
戎屬記於某某於趙君尊府提舉公有交成舊喜君
留意職業視官舍若已居用能竣事而無擾則其為
政可以概見矣於是乎書

安溪縣集右軍字續蘭亭記

得暇日邀佳友尋勝地賞良辰昔人以兼之為難况
綰銅束帶心一日不在民必有受其害者又吏議求
人是四者愈不易得僕來安溪號山水縣少事而才
短日歷僅給值連年意緒不佳此事都廢積雨快晴

吏以休告童子曰茲非脩禊辰乎於是命友聯騎東
出龍津橋步登高山山上有臺翠巘旁遶下瞰曲湍
如過几席杯行到手疾如飛羽詠蘭亭之章如與昔
人同此一席少選西登鳳池橋橋未就者數板憩於
中亭清風掀袂如跨虹登漢桴舟抵流惠亭平湖月
偃紫荷刺水白鷺窺人草木蒼蔚遊者往來堤上不
絕依約錢塘西湖之勝酒半各賦詩假筆旁舍即景
成詠不煩鉤索回泊雙清閣五峰屏立一水鏡淨觴
一再引日薄暮意戀戀猶未足嗟乎樂不可極遊不
可放斯集俱同心友又子姪偕來向之歡美今茲盡

償其所得不既充矣乎詩以蘭亭脩禊事為韻嘉定
六年歲在癸酉甯田陳宓師復序三山潘栢謙之山
遊喻時景山姪均平父子主

脩江橋記

高康軍建昌縣治之東有脩江廣十餘丈縈紆里餘
南川通衢以入溪石梁跨焉堙塞百年水決東注故
渠廣八尺長三百丈半為室廬道路幸其迹可考古
夏交氣熏為癘時潦沮滯為患甚則沒田廬嘉定庚
辰夏尉譚良翰因士民詞于縣乃聞於郡及計使令
官民錢十餘萬募夫開浚豪家歸侵地助金谷者踵

至尉以事中輒明年計使岳珂督趣廼再舉於是寓
侯李燾以私粟及社倉之積二百有七十石又鳩衆
加鑿渠百二十丈甃渠之東岸及渠東之衢各百丈
丞陳巽主之邑士馮顏李企何道莅其役黎坦司其
出納決上流花園壠水入孔家塘以溉民田又請于
計使得五十萬畧丞以甃渠之西岸其袤與衢等土
午歲季春竣事橋故名曰中易為修江李侯燾與九
江蔡念成入閩以顏等十三人書示前假守莆田陳
某俾書之不得辭也十一月望日記